

每週經課朗誦經文(巴克禮台語漢字)2014/02/16

共同經課 - 1

申命記三十三章十五節~二十節

15 「看啊，我今仔日有用活及福氣，死及災禍，排列佇你的面前。16 就是我今仔日命令你疼耶和華——你的上帝，行伊的道路，守伊的誠命、律例、法度，互你通活啲，加添人額，耶和華——你上帝就欲佇你所欲入去承接的地賜福你。17 設使你的心悖謬，毋聽趁，閣受誘惑去敬拜別個上帝服事伊，18 我今仔日就明明給恁講，恁的確欲滅無；佇你過約但入去承接的地，你的日子袂會久長。19 我今仔日叫天叫地對恁做干證；我用生死祝福咒詛排列佇你的面前，所以你著揀活命，互你及你的後裔攏會活啲；20 來疼耶和華——你的上帝，聽伊的話，結聯佇伊；因為伊是你的活命，你的日子久長也在佇伊。互你通倚起佇耶和華對你的列祖亞伯拉罕、以撒、雅各咒誓所欲賞賜in的地。」

共同經課 - 2

詩篇一百一十九篇一節~八節

1 所行完全、遵趁耶和華律法者，此號人有福氣！2 遵守伊干證的話，專心尋伊者，此號人有福氣！3 in無做不義的事，in遵趁伊的道路。4 你會將你教示的話吩咐阮，是愛阮殷勤遵守。5 願我的趨向定著，來守你的律例。6 我對重你一切的誠命，就不致見誚。7 我學習你公義的判斷，就欲用正直的心感謝你。8 我欲守你的律例；求你毋通一盡放揀我！

共同經課 - 3

哥林多前書三章一節~九節

1 兄弟啊，我前及恁講話，袂會掠恁做屬神的人，是做屬肉體的人，恁基督是做嬰仔的。2 我曾用奶飼恁，無用米糧。因為恁前袂堪得，到今猶袂會。3 是恁猶趁肉體，恁中間既然有怨妒、相爭，豈毋是趁肉體，照人的款來行嗎？4 因為此個講：「我屬保羅」；彼個講：「我屬亞波羅。」按呢恁豈毋是趁人的意思嗎？5 亞波羅是甚麼？保羅是甚麼？是恁所對in來信的差用，照主所賞賜逐人的。6 我栽種，亞波羅沃水，獨獨上帝互伊大穰。7 按呢生栽種的，沃水的，攏袂算得數；只有互伊大穰的上帝若定。8 栽種的及沃水的，是一樣，若是逐人照家己的著磨欲得著家己的工錢。9 因為阮是上帝的同著磨的；恁是上帝所作的園，上帝所起的厝。

共同經課 - 4

馬太福音五章二十一節~三十七節

21 「恁曾聽見有對古早人講：『毋通害死人；害死人的著受審判。』22 總是我給恁講，見若受氣伊的兄弟的，著受審判；見若對伊的兄弟講拉加的，著受公會辦；見若講魔利的，著受地獄的火。23 所以，你若啲獻你的禮物佇祭壇，也佇遐記得你的兄弟有甚麼脅嫌你，24 著佇遐放下你的禮物佇壇前，代先去及你的兄弟和好，然後來獻你的禮物。25 你猶及你的對敵佇路裡，著緊緊及伊和，驚了對敵交你互審判官，審判官交你互衙役，你就受關落監。26 我實在給你講，一絲一毫未還，你決斷袂會出遐。」27 「恁曾聽見有話講：『毋通行姦淫。』28 若是我給恁講，見若看見婦女來動起慾念的，心內已經淫伊。29 設使你的正目致到你犯罪，就著挖穴擲，寧可百體喪失一體，免致你全身穴落地獄。30 設使你的正手致到你犯罪，就著斬穴擲，寧可百體喪失一體，免致你全身去地獄。」31 「閣有話講：『人若欲離伊的某，著用離書互伊。』32 若是我給恁講，見若毋是為著姦淫的緣故，來離伊的某，便是互伊做有淫行的；見若娶所離的，亦是行姦淫。」33 「閣恁曾聽見有對古早人講：『毋通背咒誓，你所咒的誓著還互主』34 若是我給恁講，一概莫得咒誓。莫得指天，因為天是上帝的座位；35 莫得指地，因為地是伊的腳踏；莫得指耶路撒冷，因為是大人君的城；36 亦莫得指你的頭殼來咒誓，因為一支頭毛你袂互伊做黑做白。37 若是恁的話著講，是，就是；毋是，就毋是；諸個以外是對彼個歹的出。」